

1593 *venientibus aditum obstruat, summis laudibus videtur excipienda sententia; ita etiam paribus rationibus niteretur, ut facile excitari, defendi, hostiumque impetus ab Italia avertere arx posset: tot præstantissimorum Senatorum sententiæ, qui, matura consultatione adbibita, decretum hoc ad Senatum retulere, minime adversarer. At cum ejusmodi consilium, quo magis plausibile ac speciosum, eo majoribus implicitum difficultatibus animadvertam, cohibere me nequeo, quin ea, quæ sentio, libere enunciem. Nam valde vereor, ne, dum Carnorum securitati consulimus, eam non modo provinciam, verum terrestre totum imperium in manifesta pericula conjiciamus; dumque novam arcem pro nostrarum ditionum tuitione molimur, potentissimi hostis in nos vires eliciamus; qui, si alias in has regiones aliquo incolarum damno cum penetrasset, sese recipere ac referre pedem est coactus, si modo hac, quam meditamur, munitione casu aliquo potitus fuerit, quis ambigat, inde illum exturbare ac pellere difficillimum atque arduum fore? Sed ut cominus ad rem accedam, adversus quos novam hanc arcem excitare in animo est? An eam christianis Principibus objicimus? minime vero: cum omnibus namque amicitiam ex majorum instituto Respublica colit; atque cum iis præsertim, qui Carnis finitimi sunt. An Turcis? horum sane si incursus tantum pertimescimus, cur certo sumptu, incerta spe ingentem hanc molem erigere volumus? Si, ne cunctis conatibus Italiam aggrediantur, veremur, quis dubitet cunctos Europæ, ne dum Italiæ, Principes ad eam propugnandam terrestribus copiis classibusque conventuros; hostem vel præventuros vel aversuros, quo multis in locis distentus, sejunctis copiis, debiliior atque infirmior fiat? Tunc profecto montium aditus, amnium trajectus occupandi erunt; quod sane tutius mihi videtur, quam hostem domo excipere, atque cum eo in propria regione dimicare. Qui si, nemorum impedimentis, montium angustiis, amnium aquis superatis, ordinato atque instructo potentissimo exercitu, novam hanc arcem vel circumfidere vel expugnare sibi in animum induxerit, an non verendum erit, ne infinito prope suorum numero septus, aggeribus, fossis, propugnaculis munitus, immanium tormentorum ejacu-*